

Monsieur.

Je me garderoys bien de vous estre importun pour mon particulier si la cognoissance q^e i'ay de vostre bon naturel, et prompt volonte ne m'y conuioit. C'est pour vous dire q^e mon Beau fils le sieur Gerard Alting Docteur es loix, nepueu du sieur Henry Alting Docteur et professeur en Theologie a Groningen, s'estant par une singuliere deuotion proposé d'aller presenter son tres humble service a son Altesse, sous esperance que lors qu'il plaira a Dieu de reduire la ville de Breda en la puissance et obeyssance de sadite Altesse, son Prince et seigneur naturel, elle aura diuers nouueaux moyens de donner de l'employ en l'adite ville a ceux qui elle en iugera capables, la Royne de Boheme luy a departi vne lettre de recommandation, laquelle il desireroit presenter luy mesme a sadite Altesse; mais d'autant qu'elle est continuellement occupee en affaires de plus grande importance, et qu'il ignore les moments et occasions plus propres a cest effect, ie vous supplie par l'assurance que ie prens de vostre bien uoillence enuers moy et les miens, qu'il vous plaise, non seulement le fauoir de vostre prudent aduis, et bonne adresse, comment il se doit gouverner en cela, ains aussi de luy prestre vne bonne parole enuers son Altesse, a ce q^e grand le temps en fera naistre l'occasion, il plaise a sadite Altesse l'honneur de quelque charge politique, telle qu'elle trouuera estre pour son seruir, Il a bien estudie et acquis plusieurs tres moignages de ses bons et honnestes comportements. Sa demeure a este iusques icy a Embden, lieu de sa naissance, mais acaus des troubles suruenuz en ceste contrée la, il aymeroit mieux luy et sa femme demeurer un peu plus pres de nous. Toute la faueur et les bons offices qu'il vous plaira luy faire sentir

me seront, aussi bien qu'à luy mesme, autant de tres effectives
obligations a vous en rendre bien humbles services, ainsi
je en feray en mon particulier, avec toute la reconnaissance
et fidelite, que vous scauriez esperer de celui qui sera
toujours, veritablement,

Monsieur.

Vostre tres humble et tres affectueux
serviteur.

Th. Maurice

De la Haye le $\frac{23}{13}$
de Septembre 1637.

A Monsieur.

Monsieur Huygens s.^r de
Suylekum, Chenallie, Con.^{er}
et Secrétaire d'Etat de Son
Altesse s.

au Camp devant
Breda.

29 H

